

Akta Perpustakaan Negara dipinda 2007

UM-28/11/2006

KUALA LUMPUR 27 Nov. - Kerajaan akan meminda Akta Perpustakaan Negara supaya ia sentiasa bersesuaian dengan

kehendak semasa dan dapat memperkasakan fungsi perpustakaan.

Menteri Kebudayaan, Kesenian dan Warisan, Datuk Seri Dr. Rais Yatim berkata,

untuk tujuan itu, pihaknya akan menyemak dan meminda akta tersebut di Parlimen pada suku akhir tahun depan.

Katanya, kementerian juga akan mendapatkan pandangan dan cadangan daripada kementerian berkaitan agar akta yang diperkenalkan kelak lebih kemas dan menyeluruh.

Rais berkata, antara perkara yang diberikan penekanan ialah memantapkan khidmat dan pengurusan perpustakaan awam dan pembinaan Perpustakaan Desa yang bersesuaian dengan persekitaran setempat.

Selain itu, katanya, pihaknya akan memperkukuhkan kuasa dan peranan Perpustakaan Negara Malaysia sebagai peneraju pembangunan perpustakaan seluruh negara dan meningkatkan keupayaan anggota perpustakaan.

"Kita juga akan memantau perkembangan perpustakaan tersebut bagi mengetahui masalah dan keperluan yang diperlukan," katanya.

Beliau berkata demikian ketika menyampaikan ucapan pada Konvensyen Perpustakaan Jabatan Kerajaan dan Perpustakaan Awam Negeri 2006 di sini hari ini.

Sementara itu, Rais berkata, industri buku negara perlu dikawal bagi mengelak kegiatan orang tengah mengaut keuntungan secara berlebihan dan beliau menyeru orang ramai membeli bahan-bahan bacaan terus dari penulis.

Katanya, purata jualan buku setahun dalam tempoh 2001 hingga 2006 adalah sebanyak 9,100 judul.

Menurut Rais, berdasarkan pengamatan industri buku negara ini, kebanyakan jualan itu dimonopoli oleh penulis luar yang mengenakan kadar harga yang tinggi.

Keadaan itu, katanya, amat membimbangkan kerana ia boleh menjejaskan in-

dustri buku tempatan.

Bagi menangani masalah itu, beliau berharap lebih ramai pustakawan menulis buku dan menerbitkannya sendiri.

"Kami yakin dengan cara ini, mereka (pus-

takawan) mampu menghasilkan buku-buku bermutu, harga berpatutan serta mampu menarik minat masyarakat desa menjadikan amalan membaca sebagai sebahagian budaya hidup mereka," katanya.